

■ GLOSSA

Prenda tes chavagl ord la stalla!

DA GISULA TSCHARNER

Il chavagl vegn apprezia da novamain sco collavuratur dals umans. Ins entschaiva puspè da manar laina e da cultivar il terren cun el. *G. A. Caviezel* ha deditgà in'entira pagina da la Quotidiana a la renaissance dal chavagl da lavur (30-10-97, pag. 2). Cunbain ch'ina rentabilitad evidentana constettia betg anc, detti tschertas lavurs che sajan fitg adattadas per vegnir exequidas dal chavagl enstagl dal tractor, scriva el.

Aha. In'ulteriura bova da nostalgia sa zulla puspè ina gia sur l'agricultura. ..., termagls ..., fantasts dev'i adina..., la romantica da paura/chavagl sa puspè star buna sco estga da turissem..., i vegnan ad esser da quels verts (sco adina) da la Bassa, alternativa, öko-freeks ch'emprovan da reanimar las modas e metodas da pli baud...

Nagut da quai. Tut serius: Dus dretgs indigens da la Purtenza, ils dus Hartmanns (bab e figl) lavuran sco super-team per il Grischun enturn, prestond resultats remartgabels! Nagin termagl da folclora, nagina recidiva en la nostalgia dal tat.

Fin finala avain nus gist tschel di si Veulden engaschè ils umens Hartmann + chavagls per trair laina

en in lieu tais e malaccessibel. Il pretsch è stà favuraivel, e la lavur è stada tip-top.

Il svilup da la motorisaziun e da la computrisaziun na va tut gulivamain, pari, ma quasi cun «stortas» vers enavos e vers vinavant. Tuttina percorsch'ins ch'il chavagl, forza d'agid surrisa, per part vendida ed emblidada en ils ultims 4 decennis, sa oz emplenir ina nischa impurtanta en l'economia paura e forestala. Ins na surri, ma ins stima. Il chavagl dad ier ha tuttenina in plaz sper il tractor dad oz e sper il vehitgel digitalisà da damaun.

La frasa-clav en l'artitgel numnà è quella a la fin: «In ulteriur fatg positiv seigi ch'il ritmus da lavur dil cavagl corrispundi a quel dil carstgaun.»

Il ritmus sto correspunder. Hai jau forsà perquai cumenzà avant onns dad ir a pe a chasa suenter las sedutas giun Plaun, elavurond e tuegiend en il tscharvè las infurmaziuns.

Esi perquai ch'jau scrivel, possedend dantant in computer, vi e pli blers faxes e brevs a maun, en il ritmus da mes corp e da mia olma.

Proximamain vas er Ti forsà, tgi sa, a la fiera da pillers e cumpras in mulin a maun per moller tes café cun suaditsch sin il frunt ed en il ritmus da tes corp e da tia olma.